

中華民國郵政局特准掛號認爲新聞紙類

中華民國四年七月六號

湖南巡按使署政報處發行官書報局印

湖南政報

本報於現有各門類外附增牌示飭委一門凡委署差缺之已見諸公牘者本報立即照登以期消息之靈通而免傳述之訛誤閱者注意特告

湖南政報招登各界廣告

本報爲提倡實業起見特稟准自七月一號起仿照政府公報及各省公報例於後幅加添營業廣告一門凡各官署官私立學校與各界商民人等欲登廣告事件請查本報登載之廣告條例至本公署政報發行所暨南門外上碧湘街院南沈宅接洽可也特啓

附登廣告條例

一凡登廣告事件者須先錄稿送經本處核定後方可照刊如鳴冤洩憤與行政上有關礙抵觸之處概不登載

一凡各官署及各官有事業機關之廣告向登一日者依公布例不收刊費一日以外仍繼續登載一律收費

一凡廣告登載地位係在本報末後均用四號字如須刊大字圖畫照所佔地位面議

一告白登載三日起碼第一日每字三文第二日每字二文三日以後每字一文滿月七折一月以後六折

一凡登廣告照章先繳刊費一律無扣如縮短期限刊費不退未繳費者恕不登載

一凡登載廣告者隨送本處政報一本一星期內不另取資

湖南政報目錄

電令

大總統策令京江支電

大總統申令京支電

財政

巡按使飭商務總會准 部咨復典商鎮沅等稟請當業貼用印花辦法由

巡按使飭財政廳准 部咨復典商鎮沅等稟請當業貼用印花辦法由

巡按使飭財政廳據警廳詳報米商值年所領公穀並不散放各碓坊由

巡按使飭財政廳據常寧屬知事電請加借省倉穀四千石應行照准由

審計院呈擬訂支出單據證明規則呈請批准通行以資遵守由

巡按使批永順知事詳遵飭派員領取委員李華盛被搶賠贓錢七百串下縣由

外交

巡按使飭各縣知事保護日人山本作太郎等遊歷由

巡按使批寶慶知事詳報日人大間知梅次郎等入境日期由

湖南交涉署飭各縣知事保護日人竹田四郎遊歷並詳報入境出境日期由

內務

巡按使飭委廖秉鈞署理新田知事由

巡按使咨陳 內務部請褒揚朱廷利聶其焜巨資捐助醫院由

巡按使批警察廳詳裁撤省河水警署組織水陸洲陸警署由

巡按使批桑植縣詳報警隊長沈興海勤勞卓著請咨 部核獎由

教育

巡按使飭四道道尹准 部咨送武昌高等師範學校招生辦法一案願入考者應於七月十日以前赴本署

報名聽候示期攷送由

巡按使牌示武昌高等師範招攷辦法由

巡按使飭委陶鳳集監視私立明德中學校畢業試驗由

巡按使批私立明德中學校詳請派員監視畢業試驗由

教育綱要 續

雜件

宣 忠 脫 黨 (二則)

公 電 (三則)

電令

大總統策令

電京

直隸濮陽縣雙合嶺自二年七月八月間決口兩次當時口門本不甚寬厚及早施工尙易爲力惟時方多難工作遷延冬間遂刷至九百餘丈嗣經國務會議議決由國家擔任補助一次其時秩序未定國家歲入少而政費軍需用途至廣籌撥巨款憂憂其難僅以保守金墟爲權宜之計乃迭次派員查勘河身愈刷愈寬濮陽一隅係扼黃河之中權峙畿南之屏蔽儻遇盛漲北竄不獨東省之壽陽各縣全境將成澤國卽天津河間一帶亦恐難免波及顧念一夫不獲時予之辜雖然財政困難而民事不可再緩籌集款項五百餘萬圓大舉興修特派徐世光督辦一切事宜半載以來督率人員逐段修葺適應春夏之交口門水漲毀壞各占迭飭添料加工晝夜堵築茲據直隸巡按使朱家寶山東巡按使蔡儒楷河南巡按使田文烈會同該督辦電呈該處河工於六月二十三日進築合龍占河窄流勁屢進屢衝該督辦親率文武工員不分晝夜踴躍從事業於六月二十九日合龍告慶擬請將在事尤爲出力人員分別給予獎叙等語此項工程關係直隸山東河南三省生命財產自該督辦任事後殫精竭慮勞瘁不辭如天之福使民國以來第一大工底定功成深堪嘉慰徐世光特授以勳四位用示優崇冀南鎮守使士懷慶甯川駐工始終勤奮著卽銷去處分所有在河工營弁兵著賞銀一萬元冀南鎮守使所派駐工弁兵並著賞銀三千元由該督辦於工款項下撥給以資鼓勵餘准如所請

辦理交內務陸軍財政三部查照並交政事堂飭銓叙局查照此令

交通部顧問亞當士給予二等嘉禾章此令

張鳴岐著調任廣東巡按使李國筠著調任廣西巡按使此令

李國筠未到任以前廣西巡按使着陸榮廷暫行兼署此令

任命羅正鈞爲經界局幫辦此令

劉寶惠授爲上大夫陳毅授爲中大夫並加上大夫銜此令

國務卿呈據銓叙局詳稱遵核政事堂法內等局參事各員資格請分別叙官等語趙廷珍授爲中大夫並特加上大夫銜周貞亮驍孟任梁鴻志邵從恩李垣楊寶森歐陽熙雷延壽唐在章曹秉章傅嶽棻恩華唐桂馨均授爲中大夫李大鈞授爲少大夫金泰鍾廣言王蔭泰李先楊毓增均授爲上士并加少大夫銜此令

國務卿呈據銓叙局詳稱遵核外交等部參事司長各員資格請分別叙官等語丁道津授爲

中大夫並特加上大夫銜章祖申周傳經王繼曾陳恩厚許星璧于寶口陳時利呂鑄祝書元

許寶衡項驥李景銘姚詒慶金兆蕃徐彭齡覃壽堃夏曾佑張新吾夏循澄出步蟾何啓椿權

量周萬鵬沈祺袁齡王景春蔣尊禕均授爲中大夫袁克暄夏詒霆孫培徐文頴朴必鈞王文

豹伍崇學陸夢熊均授爲少大夫顧維鈞吳乃琛特授爲少大夫王黻焯張友棟李士熙虞熙

正賈士毅盧學溥余紹宋湯鐵樵胡以魯林行規湯中許壽裳易克臬秦瑞玠劉馥陶昌善陳

介張軼愷雷光宇均授爲上士並加少大夫銜此令

財政部呈覈獎河南續辦驗契徵收出力人員等語河南長葛縣知事何毓琪項城縣知事朱名焯前葉縣知事楊承孝征收報解均在三萬元以上西平縣知事陳守謙閩鄉縣知事孔繁昌上蔡縣知事徐孝豐鄆陵縣知事陳壽芝洧川縣知事董鳳華尉氏縣知事鄭陳琦淇縣知事李寶成洛甯縣知事賈毓黨淮陽縣知事蔣中覺延津縣知事張瑞祥虞城縣知事周宗澤汝南縣知事汪懷瑜河陰縣知事胡荃前息縣知事岳尙賢前確山縣知事翟則恆前沈邱縣知事侯必昌前浙川縣知事吳凌雲前孟津縣知事田錦堂前扶溝縣知事王俊德前登封縣知事王秀文前桐柏縣知事劉文冕前臨漳縣知事言同霖前商水縣知事徐家璘征收報解均在一萬元以上著均給予五等金質單鶴章以昭激勸前西華縣知事劉澤清既經褫職應毋庸議餘如所擬辦理此令

海軍部呈請任命饒懷文爲海軍第二艦隊司令徐振鵬爲海軍練習隊司令應照准此令

右七月三日電

大總統策令

電京

何炳庠王經燦給予三等嘉禾章此令

姚聯奎湯宗幹吳建勳祁重詰程長慶給予四等嘉禾章此令

曾秉鈺晉給四等嘉禾章此令

周貴發給予四等文虎章此令

侯元務加陸軍少將銜此令

徐鼎襄授爲上大夫此令

王杜授爲中大夫並加上大夫銜此令

陸軍部呈請任命王傳善爲廣東陸軍第一混成旅步兵第二團團長應照准此令

大總統申令

京電

法官職司審判膺人民生命財產之重寄自非精通法律周知民隱之才不足以勝厥職司法制度改革以來於任用法官雖人定有限制惟賢否雜進更調頻煩或以學派之分致啓引援之習非所以簡真材矜庶獄也嗣後任用法官著司法部嚴定資格呈候核定應由司法總長慎選堪勝簡任法官人員擇尤預爲推舉以備任用各省行政長官均有監督司法行政之責亦得按格遴選呈請預保司法官任用程序及考試方法應由政事堂飭法制銓叙兩局併入官規內一併詳擬呈候頒行以期明慎用刑案無留獄俾養成獨立之信用有厚望焉此令

右七月四日電

謹按

大總統命令本報係照京電號碼譯登如或電碼日誤漏譯甚大應請政府公報寄到隨時

查對更正

財政

湖南巡按使公署飭

爲飭知事案准 財政部咨開准咨據商務總會轉據典商鎮沅等聯名陳稱當業困難情形所有一元以上當票應貼印花懇予變通等情查照核復等因前來查當票一元以上貼用印花事屬通案各省均已照辦斷難稍予通融惟既准咨稱當商負擔稍重亦係實在情形自不得不量加體恤應即援照本部核准廣西成案凡一元以上之當票准當商自向當物之人每票收取票紙費數文仍聲明不得作爲印花稅銀以免與稅法牴觸其不及一元者仍不得向當物之人收取票紙費以示限制相應咨復貴巡按使希即核飭遵照可也等因准此查此案前據該會來詳當經本巡按使咨請 財政部酌核咨復在案准咨前因除飭知財政廳轉飭各縣知事出示曉諭外合行飭知飭到該會即便轉行各典商一體遵照辦理仍將一元以上當票酌定收費數目詳復備查此飭

署湖南巡按使陶思澄

右飭湖南商務總會

准此

湖南巡按使印

中華民國四年六月二十九日

湖南巡按使公署飭

中華民國四年六月二十九日

爲訪知事前據湖南商務總會正副會長周國鈞宋家沛等詳稱案據典商鎮沅裕昌三益聚源豫康廣濟義昌乾和永森永福和隆仁昌同仁信義四怡通濟瑞昌鼎裕自康乾升源興協和四和等陳稱竊商等前因修正印花稅法凡當票數在一元以上者即須貼印花一分當將困難情形縷懇總商會轉詳在案茲奉函開奉巡按使批飭查印花稅法第四條內載契據應貼之印花由立契據人貼用當票爲契據之一種依法應由當商購貼所請向當戶收繳之處應無庸議仰即傳諭各當商知照等因奉此查湘省典業利率規定二分五厘不准擅加非普通營業貨價隨時增減可比近來日用昂貴不啻倍蓰銀根奇緊市面折息二三分至四五分不等以有限之收入供無限之消耗此中盈虛不言而解况改革以來一班當戶多係貧民門市典當盡屬零星布帛絕少貴重物品故每日所立一元當票恒占十之八九良由年來水旱偏災小民生計艱難咸恃典當救濟目前類皆隨當隨贖以理想度之每一元取月息三十餘文除貼印花一分外尙屬綽有餘裕然證之事實上市面折息之增漲日用所需之昂貴實屬入不敷出伏查印花稅法第四條內載契據應貼之印花由立契人貼用當票爲契據之一種依法應由典商購貼等語殊不知契據相同性質各別譬如田房契據既有大宗入款復無贖取手續依法貼用原無滯碍若當票則典價利率出進一律聽人取贖不能有絲毫之活動當此國帑空虛在商民營業自由即不能獲收餘利但期資本無損亦當勉力擔負若限制一元

當票購貼印花勢必力不能支虧閉旋踵上無以裕國下無以使民諒亦非公家所忍出此卅查各省典業規章年限遠近不同利率輕重不一要皆稟經官廳核准立案斷非由商民自爲風氣蓋習慣使然必因地制宜始克推行盡利此次印花稅法始則規定十元繼復限制一元當部令頒行卅無成見不過據一二省事實酌量變通今舉一省概例全國則同一典業榮枯顯判斷難勉就範圍我部會有代商伸訴之權敢再將困難情形據實縷陳敬懇察核轉詳巡按使咨部酌予變通以恤商困而維典業等情據此查該商所陳困難委係實在情形非懇鈞署咨請 大部變通辦理該業勢難擔負理合據情詳請鈞署察核准予轉咨 財政部酌量湘省情形將當業印花稅變通辦理以利推行而維商業等情到署當經本巡按使咨陳 財政部酌核咨復在案茲准咨稱准咨據商務總會轉據典商鎮沅等聯名陳稱當業困難情形所有一元以上當票應貼印花懇予變通等情查照核復等因前來查當票一元以上貼用印花與屬通案各省均已照辦斷難稍予通融惟既准咨稱當商負擔稍重亦係實在情形自不得不量加體恤即按照本部核准廣西成案凡一元以上之當票准當商自向當物之人每票收取票費數文仍聲明不得作爲印花稅銀以免與稅法抵觸其不及一元者仍不得向當物之人收取票費以示限制相應咨復貴巡按使希即核飭遵照可也等因准此除飭知商務總會轉知各典商遵照並將一元以上當票酌定收費數目詳復備查外合行飭仰該廳即便轉飭各縣知事一體遵照出示曉諭俾各周知此飭

署巡按使陶思澄

右飭財政廳

准此

湖南巡按使印

中華民國四年六月二十九日

湖南巡按使公署飭

爲飭知事案據省城警察廳長張樹勳詳稱探聞米業公所值年彭廣豐等日前在商會領去穀六千石議定每石價銀二兩一錢秋收後有穀歸穀無穀歸銀此項公穀商會係轉領之財政廳者該廳當日用意因未設平糶之先散穀給各碓戶春賣以濟市面故該米業公所原議城廂內外各碓戶每戶應領穀一十五石五斗現查該值年等不但未將所領之穀散給各碓戶零售且自設局專賣利權獨攬各碓戶必欲領者須預繳押金五六十兩以致各碓戶紛紛有歇業閉糶之舉其意實隱示抵制於該業值年並非無米可糶應請飭下財政廳責令該米業值年等速將所領之穀分交各碓戶春賣以濟急需不足再由公家籌發蓋公米與平糶方針雖同辦法各異否則平糶開局上中各民戶仍無處購米（平糶米祇下戶貧民領有執照可以購食）市面恐慌如故甚非所以仰體鈞座維持民食之初心再財政廳前次發交商會之穀每石扣價銀若干另發各碓戶包碾之平糶穀每石給工力費若干擬請飭知該廳概與

登報公佈以免奸商從中漁利而息浮言廳長爲地面安全秩序所關見聞所及披瀝上陳伏候核奪施行等情據此查該廳發出此項公穀原爲救濟市面之政策該值年彭廣豐等在商會具領並不散給各碓坊設局專賣獨攬利權致使市面仍受恐慌殊極荒謬合行飭仰該廳即便傳諭商會從速查究至所請登報公佈穀價各節並仰該廳酌奪辦理此飭

巡按使陶思澄

右飭財政廳

准此

湖南巡

按使印

中華民國四年六月二十九日

爲飭知事案據常寧縣知事周壬電稱縣屬穀米缺乏迭經採買並詳准借發省倉二千石在案但距秋尙長不敷甚鉅人民乏食地方恐慌擬請加借省倉四千石如蒙俯准即備文具結派員照章繳押現金具領以資救濟乞速電示遵行等情據此除電復照准外爲此飭仰該廳長即便查照辦理此飭

巡按使陶思澄

右飭湖南財政廳廳長

准此

湖南巡
按使印

中華民國四年六月二十九日

審計院呈擬訂支出單據證明規則呈請批准通行以資遵守文並 批令（附單）

爲擬定支出單據證明規則呈請批准通行以資遵守謹繕清單仰祈鈞鑒事竊查審計大端在收入方面首防侵欺在支出方面嚴杜浮冒而欲杜浮冒之弊所有各種支出單據尤宜詳細證明方合計政要旨查審計法第十一條內載審計上之各種證明規則等語本院爰就審查經驗所得擬訂支出單據證明規則十六條根據法理權衡事實所訂辦法切近易行倘蒙批准通行在本院審查支出足資依據而京外各機關出納人員亦可得所遵循別無窒礙難行之慮似於審計要政不無裨益所有擬訂支出單據證明規則緣由是否有當理合繕具清單伏乞 大總統鈞鑒訓示施行謹 呈

批令准如所擬辦理即由該院通行遵照單存此批

大總
統印

中華民國四年六月十八日

國務卿徐世昌

支出單據證明規則

第一條 各官署支出單據之證明除法令別有規定外依本規則行之

第二條 凡支出以正當受款人或其代理人之收據爲主要證明其他單據均爲參考附件

第三條 凡支出非有收據不能證明但事實上不能取得收據者得由經手人聲叙理由開單證明

第四條 凡收據須由正當受款人或其代理人親筆署名後簽字或蓋印但工役及不識文字者得由經手人開具清單使其畫押或蓋印證明

第五條 凡收據須填明實收之數目收欸年月日並付欸機關之名稱

第六條 購買物品應由商號於發貨單上註明實收現金數目及日期並某機關查照字樣作爲收據其另具收據者仍應附具發貨單

前項實收數目上須蓋用商號印章

第七條 凡官吏出差經費均依財政部呈准旅費規則辦理但關於左列事項仍應特加聲明

一出差事由 二起訖日期 三停留地點（指更換舟車之地點而言） 四關於輪船火車之艙位車位等級及其他舟車之種類價目 五關於因公發電之事由 六關於

延滯期限之理由

第八條 凡工程經費除單據外應加具工程估計書各項圖說暨監工官吏技師等之證明書件其訂有合同及招商投標者並應鈔送合同及投標文件

第九條 各項單據均應由出納官吏簽字或蓋印並將用途簡單注明

第十條 按照印花稅法應貼印花之單據均須貼用印花

第十一條 各單據上有雜列各種貨幣者應註明折合國幣總數及折合率

第十二條 凡非漢文之單據應由經手人將其中重要條件附譯漢文

第十三條 原單據所開名目價值數量如有不甚明晰之處并不能使受款人補填完備

者應由經手人另加註明於數目上蓋印並附說明

第十四條 各官署應備單據黏存簿將各單據區分項目節依次編號黏存並於單據上

註明所屬項目節

第十五條 凡參考單據均應註明係某號單據之附件按號附列於後並於該號單據上

註明附件總數

第十六條 本規則未盡事宜由審計院隨時行文定之

湖南巡按使陶批

批永順知事詳遵飭派員領取委員李華盛被搶賠賍錢七百串下縣由

詳悉委員李華盛前在該縣中途被搶經會前知事責成逃匪家族賠贓錢柒百串文嗣經前任巡按使劉飭該知事領取下縣作為該縣習藝自新所補助之費前據遵飭派員具領應准隨批核發仰即查收遵照前案辦理可也此批(印領存)

計發票錢七百串文

外交

湖南巡按使公署飭

爲飭行事案據特派湖南交涉員詳稱案准江蘇交涉署函開日本國人山本作太郎請照前赴江蘇浙江湖南湖北江西等省游歷又函日本國人大河內林平田中塞一請照前赴浙江江蘇江西安徽湖南湖北等省游歷又函小西秀雄請照前赴江蘇浙江江西河南湖南湖北四川福建等省游歷各等因函請飭屬保護到署查外人請照游歷自應照約保護惟遇經過地方設有不靖情形所在地方官應即婉爲勸阻毋任前往以昭慎重又節奉 部飭近來每有藉口游歷或夾帶軍火或測繪地圖情事尤應於保護之中切寔注意茲准前因理合具文詳請鈞署俯賜察核通飭各屬俟各該游歷人到境卽行照約保護并祈飭於保護之中切寔注意深爲公便等情據此除分別飭行外合行飭仰該知事卽便遵照辦理此飭

巡按使陶思澄

右飭各縣知事

准此

湖南巡按使印

中華民國四年六月二十九日

巡按使陶批

批寶慶知事詳報日人大間知梅次郎等入境出境日期由

據詳已悉此繳

湖南交涉署飭

為通飭事案准江蘇交涉署函開日本人竹田四郎請照赴湖南等省游歷請飭保護等因到署准此除詳請巡按使通飭保護外合亟通飭各縣知事遵照一體照約保護并將入境出境日期及在境情狀詳紀具報毋稍大意切切此飭

外交部特派湖南交涉員朱彭壽

右飭各縣知事 准此

外交部特派湖南交涉員之印

中華民國四年六月三十日

內務

飭

湖南巡按使公署飭

爲飭委事照得新田縣知事崔鎮岳因病辭職所遺員缺查有該員廖秉鈞堪以署理除分別咨行外合行飭委飭到該員即便遵照限于十日內束裝起程馳赴新田縣接印視事務須勤慎供職并將前任經手款項文卷及一切應行交代事件逐一點收清楚分別具報一面將履歷及奉委起程到任各日期先行報查切切此飭

巡按使陶思澄

右飭新委署理新田縣知事廖秉鈞准此

湖南巡按使印

中華民國四年六月二十九日

湖南巡按使咨陳 內務部文

爲咨陳事案據長沙縣知事余聯輝詳稱案據紅十字會醫院院長顏福慶董事粟勘時等稟稱爲創興公益援例請獎事福慶等伏讀政府公報所載褒揚條例凡熱心公益捐助鉅款事寔確鑿者均在褒揚之列仰見 大總統獎勵公益誘人向善至意遵查本會醫院董事聶

其焜於醫院權輿極力提倡除常年捐款不計外朱廷利特別捐銀二千兩以爲本分會藥房基本金聶其焜特別捐款一千五百元以爲創設癆病醫院建築費此其熱心公益昭昭在人耳目者又有當日事涉秘密而真寔確鑿爲福慶等所獨知者如民國二年湘省取消獨立之前朱廷利深知獨立非譚前都督本意若有所藉口立可取消晝夜焦思向福慶等密商邀同雅禮醫院院長胡美醫士運動漢口美領事轉求黎副總統發電來湘以爲譚前都督轉圖之助時值胡美醫士避暑九江未返而福慶遂有下游之行朱廷利猶有緩不濟急致釀戰禍糜爛湘鄂之恐又寬籌旅費商請福慶胞兄明慶赴漢敦促美領事并請福慶堂兄制慶將湘人意見轉達黎副總統求其暫緩進兵俾免激成戰端使爲取消運動者無所措手致不易收拾此又朱廷利之私助欸項顧全大局苦心孤誼之信而有徵者也當其時聶其焜則以既係本會董事率領醫士李清茂及醫隊至新堤等處設立紅十字會戰時病院并擬將于本分會旗幟上增加符號以別於湘軍野戰病院之旨通知鄂軍免生錯誤不意竟被鄂軍疑爲奸細縛赴副總統府軍法處詳細訊明之後猶復拘禁四日始行釋放此又聶其焜之熱心公益轉以受辱幾瀕危險之實在情形也以上各節福慶等均身與其事確知其詳在朱廷利聶其焜雖無求名希獎之心而福慶等以爲既屬本分會董事又因牽連而發生種種重要關係利國益民慨捐鉅款核與褒揚條例第一條第六款相合若默爾不言既非所以仰副大總統與人爲善之心亦非所以獎勵來者之道理合具陳事狀請予確攷行實轉詳巡按使公署鑒核

早報實爲公便等情并實證明書到縣據此查朱廷利係湖南汝城人聶其焜係湖南衡山人讀書談道樂善好施愛國本具熱忱利人尤殷素志前次紅十字會創辦醫院該紳等各捐銀二百兩以爲首倡開辦無虞缺乏旋即特捐銀二千兩或洋一千五百元其藹然仁者之心于茲益信雖增榮益譽非當事者之本心然表德闡幽亦旁觀者所難恕茲據顏院長等證明前來核與褒揚條例第一條第六項資格相合理合檢同證明書并註冊費由 知事繕具證明書 詳請鈞署察核轉咨內務部呈請 大總統給予褒揚以風薄俗而維善舉附實證明書註冊費等情據此查朱廷利聶其焜捐助醫院經費均在一千元以上核與褒揚條例第一條第六款及施行細則第六條規定之行誼相符相應備文檢同原實證明書註冊費咨陳 大部請煩查核彙案呈請褒揚以昭激勸爲此咨陳
內務總長

計證明書二件註冊費銀十二元

湖南巡按使陶思澄

中華民國四年六月二十九日

湖南巡按使陶批

批警察廳詳裁撤省河水警署組織水陸洲陸警署由

據詳已悉省河水警既據尅日移交水警廳辦理即于月底撤署辦法自爲正當水陸洲地方

華洋雜處至關重要水警甫經成立防範恐有未周業經該廳長詳准前巡按使仍設陸警以資照料應准照案辦理惟經費雖已加入四年下半年預算咨部尙未核准自入七月以後凡非三年度預算核准有案者現准 財政部咨不得開支而該處陸警有關緊要自該廳長設警以來頗爲得力應准特別變通維持暫行組織派出所酌設相當崗警巡邏隸屬西區或由廳辦理以保治安毋庸照設專署以資節省仰卽遵照切實規畫妥爲辦理具報此繳

批桑植縣詳報警隊長沈興海勤勞卓著著請咨部核獎由

詳及實件均悉警察獎章條例上年十月內曾經 內務部略加修正咨由劉前使通行遵照在案是此項修正條例頒行之後以前公布之警察獎章條例當然不能引據乃察閱來詳該隊長事實尙合獎例而援據條文與修正條例不符又復雜引襲揚條例實有未合應再按照續頒條例聲敘事實詳候核咨仰卽知照繳實件發還

教育

湖南巡按使公署飭

爲飭行事案准 教育部咨開據武昌高等師範學校校長張道詳稱本校增加經費案業依據湖北巡按使認定數目詳報鈞部立案查原案本年可招預科學生二班現距伏假爲日無多關於招生事項自應先事準備本校名屬國立地居武昌理宜勻配各省學額以便負笈而免向隅茲擬具招考預科學生辦法十四條詳請鑒核如蒙核准並懇迅爲分行指定各省巡按使按照學科程度考選合格如額學生送校預試以定棄取如程度均優亦可全收惟此次所擬省分共爲湖北等十二省至直隸山東四川江蘇奉天吉林黑龍江甘肅新疆等省或本距京甚近原可就近入學或以該省設有高等師範可以招生均未列入與考資格義取嚴格以中學校或師範學校畢業爲限無同等學力之通融以示鄭重師資之意所有本校擬招預科學生辦法轉懇分行各省考送情形理合詳請鑒核訓示遵行等情前來查該校本年招考預科學生二班係爲英語博物及數學物理部之預備所請分咨各省由巡按使選送之處事屬可行應卽分別行知貴省按照該校招生辦法考取八名準八月十五日以前電報本部九月一日以前齊集武昌聽候該校覆試惟師範人才關係教育前途甚鉅務須特別鄭重應請貴使飭教育科從嚴甄錄甯缺勿濫是爲至要除分咨外相應印送該校招生辦法一分咨行貴使查照辦理可也此咨附招生辦法一紙等因准此除牌示招致并分行外合行飭仰該道

尹即便飭屬照錄招考辦法出示曉諭如有願赴武昌高等師範學校肄業具有與考資格各生應於七月十日以前赴本署號房報名填具履歷注明將來願入某部肄業并呈畢業文憑繳納四寸半身相片聽候示期收送此飭

計抄發招收辦法一紙

巡按使陶思澄

右飭四道道尹

准此

湖南巡按使印

中華民國四年六月二十九日

湖南巡按使公署牌示

為牌示招收事案准 教育部咨開據武昌高等師範學校校長張渲詳稱本校增加經費案業依據湖北巡按使認定數目詳報鈞部立案查原案本年可招預科學生二班現距伏假為日無多關於招生事項自應先事準備本校名屬國立地居武昌理宜勻配各省學額以便負笈而免向隅茲擬具招收預科學生辦法十四條詳請鑒核如蒙核准并懇迅為分行指定各省巡按使按照學科程度收選合格如額學生送校覆試以定棄取如程度均優亦可全收惟此次所擬省分共為湖北等十二省至直隸山東四川江蘇奉天吉林黑龍江甘肅新疆等省

或本距京甚近原可就近入學或以該省設有高等師範可以招生均未列入與考資格義取嚴格以中學校或師範學校畢業爲限無同等學力之通融以示鄭重師資之意所有本校擬招預科學生辦法轉懇分行各省考送情形理合詳請鑒核訓示遵行等情前來查該校本年招考預科學生二班係爲英語博物及數學物理部之預備所請分咨各省由巡按使選送之處事屬可行應卽分別行知貴省按照該校招生辦法考取八名準八月十五日以前電報本部九月一日以前齊集武昌聽候該校覆試惟師範人才關係教育前途甚鉅務須特別鄭重應請貴使飭教育科從嚴甄錄甯缺勿濫是爲至要除分咨外相應印送該校招生辦法一分咨行貴使查照辦理可也此咨附招生辦法一紙等因准此合行抄錄辦法出示招考爲此示仰曾在中學校及完全師範學校畢業各生知悉該生等如願赴武昌高等師範學校肄業卽於七月十日以前赴本署號房報名填具履歷注明將來願入某部肄業并呈驗文憑繳納四寸半身相片聽候示期考試毋得觀望自誤切切此示

計抄招考辦法

(一) 本年招考預科學生定額八十名分入英語部數學物理部及博物部

(二) 招考方法如左

(甲) 在武昌招考三十名不分省界由本校直接辦理

(乙) 各省應取名額由教育部行文各省巡按使查照辦理如該省合格之人不足額

時甯缺毋濫

甲乙兩項擬招名額合計較定額增加十名以便到校覆試從優錄取如均合格亦可全收其程度較次者暫令作為額外生自費入校俟出額時遞給公費

(三)考試日期由各省酌量情形自行規定其武昌考試日期由本校酌定登報公布

(四)與考各生年齡須十八歲以上二十五歲以下曾在中學校或完全師範學校畢業為合格其考試科目如左

(一)國文 (二)英語 (三)歷史 (四)地理 (五)理化 (六)數學

算術代數
幾何三角

(七)博物 (八)圖畫

應考科目之中除國文一科均應注重外志願入英語部者注重英文入數學物理部者注重數學入博物部者注重博物

(五)此次所招學生不收學費并供給食宿惟書籍文具均由各生自備入學時并須繳納制服費

(六)此項考試由各省巡按使就近委託本省專門學者按照以上所定程度分別擬題評定分數此項分數以平均五十分以上為及格惟注重科目不滿六十分者均不得錄取

(七)各省錄取學生人數於八月十五日以前電部飭知本校

(八)各省錄取學生由巡按使給予公文限於本年九月一日以前齊集武昌連同本校取錄各生一體覆試

(九)各省錄取學生須由巡按使教育科造具履歷操行冊一份四寸半身相片各一紙及各生試卷一併函送本校查核但履歷冊內須註明將來願入某部肄業

(十)本校覆試於九月一日後兩星期內舉行

(十一)各省來校覆試學生應將畢業文憑於考試前到校呈驗

(十二)凡覆試不及格相片不符及字跡與原卷不同者一概不得入學

(十三)凡覆試錄取學生按照校章填寫志願書及保證書並納制服費十五元隨班上課否則即行分別照章取消入學資格

(十四)凡各省學生來校覆試無論錄取與否所有旅費川資及其他費用均須自備

湖南巡按使公署飭
爲飭委事案據私立明德中學校校長胡元倓詳稱本校學生鍾榮森等於前清宣統三年七月入學至今年暑假前各門學科陸續教授完畢元倓以前報開學期誤請予更正准予畢業詳請在案奉批詳悉據稱前營學生一覽表所填宣統三年八月入校實係謄寫錯誤應准於本年八月以前畢業等因奉此本校遵於七月一日起逐日分門舉行畢業試驗敬懇鈞署派員前來監視以昭慎重等情謹此除批示外合行飭委該員即便遵照依後開試驗時間前

赴該校監視勿稍疎懈此飭

計抄發試驗時間表一紙

巡按使陶思澄

右飭委陶鳳集准此

湖南巡按使印

中華民國四年六月二十九日

巡按使陶批

批私立明德中學校詳請派員監視畢業試驗由

詳悉准派員屆時監視試驗以昭慎重仰卽知照繳

教育綱要

續前

三申明教育宗旨注重道德實利尙武並運之以實用以命令頒布

說明 現時教育最大之缺點有四一不重道德二不重實利三無尙武精神四不切實用教育部前經頒布教育宗旨注重道德實利軍國民美感各教育惟未標明實用主義惟部令雖頒國內並未奉行教育迄今無一定趨向是宜重加規定以道德教育爲經以實利教育尙武教育爲緯以道德實利尙武教育爲體以實用主義爲用(實用

教育以各學校注重理化博物等實科之實驗爲始尙武教育以自初等小學注重體育衛生加以軍隊束伍進退之法爲始）特下命令頒布宗旨更由教育部派視學隨時至各地方視察實際能否履行據以考定成績並徵集各學校教授日記及管理心得與中學以上講義歲考而月要之

四變通小學中學學制名初等小學校爲國民學校以符義務教育之義並于中學校得附設預備學校以爲升學之豫備

說明 初等小學校之設所以容全國有教育義務之兒童而授之以國民必不可少之德慧職能既有所專自應特稱國民學校以符名實修學年限仍爲四年此類學校既重在普及則徧求完善固非一時所能而世家子弟力能深造者或不願就學於此欲求調適各得其所應將中學制度稍稍變通今得附設豫備學校以爲有志升學者地其修業年限定爲七年或六年與現制兩等小學年限無甚出入此類學校既專爲志在升學者而設校數不多辦理必須完備如此變通較現制實爲便利

五各地方固有學款宜分別保存不得移作他用並將國家地方稅項查明釐定確定學款支出範圍以防混淆在兩稅未分以前暫照各地方習慣以部款省款縣款三種支配之

說明 按各國辦學經費向視學校之種類性質有國稅支出地方稅支出之別改革

以來各地方固有學款半充他項行政之用固由財政紊亂竭蹶兩稅不分致遭侵奪亦由前此辦學所用經費不分國家地方稅項一併開支界限既淆自易搖動現在財政既有統一之望其舊有學款屬於地方稅範圍者應即保存不得移作他項行政經費之用由教育部與各省巡按使妥商辦理另由財政部將國家地方兩稅查明釐定俟稅則劃分後按其行政性質分別支出彼此不相侵奪其學校經費應由國家支出或補助者由教育部與財政部隨時商訂辦理兩稅未分以前仍聽各省按照習慣辦法劃定部款省款縣款之範圍以爲將來劃分支出之準備惟在部款支出範圍有願以省款支辦及在省款範圍願以縣款支辦者悉聽其便

乙教育要旨

一各學校均應崇奉古聖賢以爲師法宜尊孔尙孟以端其基而致其用

說明 學堂崇奉聖賢非爲宗教之信仰實以爲師法之極則孔子道大無所不包孟子開端即言義利之辨因戰國時人人競利乃反覆言義以藥之正與今日人心知有權利而不知有義務責任後先一轍故尊孔並應尙孟以其時代俗尙相近讀孟子一書實不啻爲學生現身說法不僅爲道統所關也且孔孟當道德淪喪之際皇皇仁義百折不撓絕無利己之見存其愛國熱誠允足風示萬世是爲國民立國之精神

一中小學教員宜研究性理崇習陸王之學導生徒以實踐教科書宜採輯學案以明尊

孔尙孟之淵源

說明 乙項首條既明示尊尙孔孟之主旨然欲明尊尙孔孟之歷史則道統源流不可不知宋明學案等書于師傳之統系學說之異同言之綦詳其中學派歧出求其適用於今之時勢莫如宋陸象山明王陽明兩先生其學近于孟子主張力行致知之說一掃末流文勝之弊當今學子義利之辨不明爲世道隱憂尤當力崇陸學奉爲圭臬陽明專以致良知爲主令學者自求創解不落窠臼尤屬哲學家特識或病其墜入禪學仍是舊日思想要其功業自在千秋日本王學最盛東鄉口將謂一生得力于王學其惟新功臣大都陽明一派價值可知中小學教員既職司普通教育當抱定知行合一之說身體而力行之以指導受學之國民而勵之于實踐至教科書如歷史國文等科亦宜將宋明學案選擇撮要編入以明道統之源流講求心性之學實教育國民必不可少之微旨也

三道德教育宜師英美之高尙以涵養德性宜師德國之嚴重以鍛鍊氣質俾與國粹團結爲一以採世界特性之長

說明 歐美教育道德之方法隨種性而各異英美民族高尙優美故其教德利用感化主義德國民族渾樸故其教德利用嚴格主義以中國現時社會人心論振靡式浮宜取法于德以民性論仍宜兼師英美兩派互用庶可調和發達

四中學小學修身科國文科應將誠心愛國盡責任重閱歷之積極行爲與勿破壞勿躁進勿貪事之消極行爲編入此二科中教授一面準此以爲訓練俾在受學時期養成其意志與慣性以資涉世處事時之應用

說明 誠心愛國盡責任重閱歷勿破壞勿躁進勿貪事諸端均係處世必需之志行必須在學校中平素養成應將以上各項編入修身國文教科書中并本此訓練成熟俾德性堅定習慣自然

五各學校教員宜注意學生之箇性陶冶獎掖其良知良能並養成其自動力暨共同習慣

說明 不問學生之性質如何惟施以同一之教法不策勵學生之自動自勉惟以注入教授養成其依賴性不在學校中養成共同之習慣使爲將來處世合羣之先例此皆近日學校教育之缺點害及身心而後日殊費矯正者也司教職者一方宜用注入教育造成爲器使之人物一方又宜用自然教育陶冶其個人之特性是在教職員平日研究生理心理各學及各教育家學說而應用之自得其道又學生在學時固在教員之善誘善導使其有迎刃而解之領悟尤宜勵其自動力爲脫去依賴性之先机故養成自動力亦屬教育要道又國內社會舊習于合羣之一切美行均甚缺乏故共同事業之進行動生障礙學校亟宜養成其共同習慣以改良社會道德

六明示教育趨向使人人知求學係造就本身能力用以開發社會無窮事業非僅供官吏一部分之用凡從前入學專以干祿之惡習切宜破除以養成國民獨立之精神各學校均用此著爲校訓

說明 此項由教育部通飭各省學校著爲校訓令職教員舉其事實理由時時爲學生講演并由教育部嚴定限制學校職教員及畢業生服官之法以轉移風氣使學者知求己而不求人

七自小學以至大學無論教授試驗管理均取嚴格主義以造成嚴正之人格正確之知識

未完

雜件

湖南省覆選區選舉事務所據芷江等縣初選監督詳稱各該初選區調查員田宗周等前隸共和黨早經脫離合行登報聲明

芷江縣

田宗周

彭炳麟

張齊

李昌澄

唐梅溪

郴縣

黃日蓉

袁鵬飛

何海樓

蔣易

唐繼軒

李凌霄

醴陵縣

張堪博

武岡縣

潘毓麟

陸孝篤

劉示祺

潘合王

謝紀齡

蕭翹俊

向炳熾

袁國柱

保靖縣

張世資

樊孝經

淑浦縣

袁世珉

舒玉衡

湖南省覆選區選舉事務所據平江等縣初選監督詳稱各該初選區調查員陳毓慶等前隸民主黨業于改組時脫離關係合行登報聲明

平江縣

陳毓慶

武岡縣

鄧集勳

王伯年

公電 (三則)

長沙巡按使財政廳長湘江道尹鈞鑒據屬縣水災事務所紳董稟稱災後穀無接濟轉運困難各區農民典當一空請發借縣儲倉穀萬石由殷實正紳具結領發秋後如數歸倉事關倉儲未敢擅專謹懇電示祇遵醴陵知事周振成叩支

淑浦徐知事陷電悉龍潭鎮復被大水災情更甚深堪憫恤仰速勘明詳報妥籌撫綏巡按使陶徵印

湖南政報處通告

本報爲預防省城內送報夫役侵蝕報費起見特製有二聯收費據若干紙以一聯存本處備查以一聯給各閱戶收執茲定自七月一號起凡城內各閱戶欠繳報費本處卽按月照數填寫收據月終卽酌派妥人持向催收務望各閱戶憑此收據交費如無此據而私自交付者本處概不認賬此白

本處緊要啓事

本處爲稽查報費防報差浮冒侵蝕起見特製有二聯定報單一紙以一聯存根備查以一聯交定報者填寫後照單發報嗣後購報諸君親來本署發行所訂閱本報務請照式填寫若係在外向報差面訂者亦請將姓名住址定閱之份數暨期限以及當付報費若干詳細開條交報差帶回以憑換填定單照送如無定單概不發報用特聲明此啓

